


平定兩金川方畧



平定兩金川方略



平定兩金川方略卷之七十一

八月丁卯。

上諭內閣曰。前因溫福在軍營漫無調度。倉猝遇變。輕以身殉。致文武員弁兵丁同時陷沒。揆其失事之由。皆因溫福之倉皇失算。以致折將損兵。其死乃由自取。豈可復邀五等之封。已將賞給伯爵銷去。昨巴雅爾至熱河。詢及木果木軍營致潰情形。

據稱溫福性褊而復。叅贊以下之言。概置不聽。又不察地勢之險易。不知士卒之甘苦。常令攻碉。多傷兵衆。其實並未能得賊人緊要碉卡。安營之處。復距水甚遠。平時既不得人心。臨時又全無措置。以致于潰。今富興至行在。復面加詳詢。據奏與巴雅爾所言大率相合。又所稱不恤兵力。常令伐木運石。築柵孛卡。且派撥萬餘兵。分守千餘卡。以極

盛兵力。散處零星。均歸無用。實爲失策。又分派各路將領時。溫福營中除德爾森保外。不留御前及乾清門侍衛一人。恐於朕前洩其情狀。是溫福竟敢意存欺罔。實出情理之外。前因溫福在烏魯木齊辦事認真。率兵勦捕倡亂賊犯。且曾隨兆惠等在軍營閱歷。因命其由滇入蜀統兵。伊甫至軍營。卽攻克巴朗拉。收復達木巴宗等處。軍勢大有起

色。因卽擢任大學士。並授爲將軍。伊亦頗知奮感。初不料其躁妄乖張。失策僨輓。一至于此。使其身尚在。卽當立正典刑。以申軍紀。今已沒于王事。朕斷不肯追治其罪。惟諭阿桂。豐昇額等。當引以爲戒。不可蹈其覆轍。並自悔前此悞信其言。不發滿洲勁旅。惟有引咎自責。仍不欲以事後諉過。臣下所有應得世職。仍着該部照例給予。並將此再行

通諭知之。

同日彰寶奏言。此次奉調滇兵二千。計至七月

二十四日。可至川省之赤水河。

臣

現飛催提督

常青。卽由騰越起程。馳驛遄行。一與滇兵遇見。

帶領迅赴打箭爐一路。復飭管領滇兵之副將

巴福書。叅將熊擎柱。亦赴打箭爐一路。聽候調

用。奏入報。

聞。

戊辰。阿桂奏言七月二十一日。臣抵黃泥舖。適

富勒渾遵

旨前來接應。並順道查辦糧務人夫。據富勒渾送閱

海蘭察等咨文。博清額普爾普已帶兵五百名。

由木坪一路前來策應。查臣南路官兵業已扼

據險隘。以備整力再進。並無需于接濟。而西路

官兵屢屢奔潰。實未可恃。是以臣令將續到黔

兵一千名。亦派往協同駐守。所有此項官兵五

百名。臣已令博清額等仍由原道回赴西路軍

營。至此次所調滿洲官兵入川。臣過省時。與文

綬等面爲籌酌。務使地方不擾。而官兵行走。仍

無虞于阻滯。奏入。

上嘉之。

同日阿桂富勒渾奏言賊番自跳梁以來南路

章谷一帶後路綿長是以臣富勒渾派撥川兵

三百名新兵二百名並于民壯內揀派四百名

遣赴軍營聽候調用今臣阿桂已將章谷各處

防範周密其自章谷以至打箭爐皆明正土司

所屬只須于現有兵丁之外酌添以資守護惟

查革布什咱地方多與賊境毗連雖有漢土官

兵千餘名。分布防守。聲勢不免單弱。而丹東二處。東接吉地。西通綽斯甲布之木池。該處原有之兵。亦爲太少。臣等卽將川省制兵二百五十名。交原領之遊擊程萬年。帶往丹東協同駐守。庶可以絕賊人窺伺。而于綽斯甲布軍營。通章谷一帶之後路。亦更爲有益。至打箭爐雖距兩金川稍遠。并尚隔明正。巴旺。布拉克底革布什。

咱各土司之地。但係軍營往來咽喉。當此軍務
殷繁。現存之兵實不敷用。應于撥到壯丁四百
名內。派二百名。交泰寧協副將哈廷樑。留于打
箭爐。與各兵一體差遣巡防。其餘二百名。添派
于章谷以內各糧臺。同原有之兵。實力防護。至
此後應派南路之新到官兵。臣阿桂謹遵

旨酌撥于打箭爐及東谷剛察茂紐等處暫爲存駐。

俾伊等就近支糧。既可稍省輓運之費。而一旦調撥亦爲容易。且于後路一帶兵勢更爲壯盛。

至甲金達一處。近經臣富勒渾于調到新舊兵

內。派往二百五十名防守。但甲金達距賊尚遠。

而山下牛廠一處。近通小金川本布爾桑岡。更

爲緊要。海蘭察等雖已撥兵防駐。爲數不敷。臣

阿桂已面交博清額。普爾普令其經過甲金達

時查看情形。將此項新舊兵二百五十名。卽改撥于牛廠。併力防範。奏入報。

聞。

同日富勒渾奏言。臣於名山縣途次。接奉

上諭。令分兵前後續進。往迎阿桂。茲臣行抵榮經縣

之黃泥鋪站。迎見阿桂。據云章谷以外。至翁古爾壟各要隘。俱經安設重兵。防守嚴密。其自章

谷以內至打箭爐一帶。臣原擬安設兵丁民壯

護守糧臺。現復與阿桂商酌。視其地方緊要處

所。分別增添改設。至於南路臺站夫馬。口外現

有臬司李世傑。口內現有鹽驛道杜玉林分段

督辦其打箭爐一處。臣派有知府副將等督

兵防守。足資彈壓。惟查西路自桃關至巴朗拉

一帶最關緊要。且現在添調滿漢官兵將軍大

臣等齊集此路。定議分兵。一切應付及籌辦事
宜。均須預爲經理。臣現在馳赴桃關巴朗拉一
帶。會同劉秉恬督辦一切。並於順過省城時。面
與文綬商酌奉

旨招商運糧各事。悉心經理。奏入。報
聞。

同日。文綬奏言。查京兵入川。自成都赴軍營。原

擬在桃關雅州兩處折與馬價。令其步行。第自
成都至桃關。程站無多。而自灌縣以西。道路卽
多陡仄。馬匹不能得力。沿途又須饋運草料。應
令卽在省城折給馬價。聽其自便。更爲妥協。其
大小官員。亦併于省城照例分別支給騎馬。並
折支餘馬。以歸畫一。奏入。報
聞。